

# Ils Latins èn sutrepreschentads en l'administraziun federala

■ **(Iq) Ils Franzos, ils Talians ed ils Rumantschs èn anc adina sutrepreschentats en l'administraziun federala, era sche la situaziun è sa megliera in zichel ils ultims onns.** Re-guardan ins mo las posiziuns da cader va il departament dals fatgs da l'exteriur cun la plima ed il departament per defensiun, protecziun e sport ha la laterna cotschna.

Quai documentescha in studi dal magazin «L'Hebdo» che è cumpari mesemna. Per la nova perioda da legislatura, pia fin 2015, ha il cussegl federal tschentà sco

finamira da limitar ils represchentants da la Svizra tudestga a 70 pertschient. L'onn 2010 muntava la cumpart dals Tudestgs anc a 72,1 pertschient.

## Cader superiur sut la marella

Tar la part romanda han ins fixà la finamira a 22 pertschient (2010: 21%), tar ils Talians a 7% (2010: 6,6%) e tar ils Rumantsch 1 pertschient (2010: 0,3%). L'Hebdo ha prendì sut la marella cunzunt il cader superiur, ils emploiads che fatgian dapli che 195 000 francs.

Tenor las cifras dal Servetsch da per-

sunal da la confederaziun èn dals 873 emploiads da las classas superiuras per 74,6 pertschient da lingua tudestga, 20,8 pertschient da lingua franzosa, 3,9 pertschient da lingua italiana e 0,6% da lingua rumantscha. Questas cifras na sajan betg lunsch davent da las finamiras.

Da departament a departament datti dentant differenzas considerablas. A la fin da la rangaziun sa chatta il departament per defensiun, protecziun e sport dad *Ueli Maurer* cun mo 10,3% da personas da la Svizra franzosa ed 1,1 % da la Svizra taliana.

In departament exemplaric ord optica da la represchentanza linguistica en las posiziuns da cader è il departament dals fatgs da l'exteriur che vegn timunà da *Micheline Calmy-Rey* che è dapi 1970 en mauns latins. Là èn 28,9% dals emploiads da cader da lingua franzosa, 6,1% da lingua taliana ed 1 pertschient da lingua rumantscha.

En il departament da l'economia publica han ils Latins ina cumpart da 23,4 pertschient (franzos) ed 1,4% (talian). Tar il departament da giustia e polizia èsi 20,8% resp. 3,7% ed en il departa-

ment da l'intern 19,7% resp. 5 pertschient.

La bilantscha en il departament per ambient, traffic, energia e communicaziun è summa summarum mendra. 14,6 pertschient dals emploiads da cader èn da lingua franzosa e 4,4 pertschient da lingua taliana. Las finamiras dal cussegl federal pertutgant ina represchentanza linguistica commensurada da las parts latinias en l'administraziun federala èn fixadas en il nov reglament da linguas. Quel è entrà en vigur il 1. da fanadur 2010.